

修訂日期: 2004/10/07 發行日期: 2006/2/1

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 1, No. 036

原始資料: 蕭鎮國大德提供, 張文明大德提供, 北美某大德提供

No. 36 [No. 26(51), No. 37]

佛說本相猗致經

後漢安息國三藏安世高譯

聞如是。一時佛在舍衛國祇樹給孤獨園。佛便告比丘。本有愛不見不了。今見有從有愛。設是本有愛無有今為有。今見分明。從是本因緣。令致有愛。有愛比丘從致有本。不為無有本。何等為比丘從有愛致本。謂為癡。

癡亦比丘有從致本不為無有本。何等為比丘癡有本從致。謂為五蓋。

五蓋比丘亦從有本致。不為無有本。何等為比丘五蓋從有致。謂為三惡行。三惡行比丘亦有本從致。不為無有本。何等為比丘三惡行本從致。謂為不攝根。

不攝根比丘亦有本從致。不為無有本。何等為比丘不攝根從致。謂非本念故。

非本念比丘亦有本從致。不為無有本。何等為比丘非本念從致。謂不信故。

不信比丘亦有本從致。不為無有本。何等為比丘不信本從致。謂惡非法聞故。

非法聞比丘亦有本從致。不為無有本。何等為比丘非法聞本從致。謂非賢者人事

。非賢者亦有本從致。不為無有本。何等為比丘非賢者從致。謂非賢者人共會樂。如是比丘已不賢者聚會滿。令不賢者事滿。已不賢者事滿。令非法滿。已非法滿。令不信滿。已不信滿。令非本念滿。已非本念滿。令不攝根滿。已不攝根滿。令三惡行犯法滿。已三惡行犯法滿。令五蓋滿。已五蓋滿。令癡滿。已癡滿。令有世間愛滿。如是愛樂滿稍轉稍轉猗增有。

度世智慧解脫亦有本。不為無有本。何等為度世智慧解脫本。謂七覺意為本。

七覺意從有本。不為無有本。何等為七覺意從有本。謂為四意止。

四意止從有本。不為無有本。何等為比丘四意止從有本。謂三清淨行。

三清淨比丘亦有本從行。不為無有本。何等為比丘三清淨有本。謂為守攝根。

守攝根亦有本。不為無有本。何等為比丘守攝根有本。謂為本念故。

本念比丘亦有本。不為無有本。何等為比丘本念本。謂為信本。

信本比丘亦有本。不為無有本。何等為比丘信本有本。謂聞法經本。

聞法經亦有本。不為無有本。何等為聞法經本。謂事賢者本。

事賢者亦有本。不為無有本。何等為事賢者有本。謂賢者聚本。

如是比丘。聚賢者能得事賢者。已事賢者。便聞法言。已聞法言。便致信本。已致信本。便得念本。已得念本。便攝守根。已攝守根。便得三清淨。已有三清淨。便

得四意止。已得四意止本。便有七覺意。已有七覺意。便有無為解脫得度世。如是解脫度世。轉轉本。令得度世。佛說如是。弟子受行。

佛說本相猗致經